


Cumegn Albula/Alvra



**Lescha d'ustareia
aint igl cumegn Albula/Alvra
(Lescha d'ustareia LU)**

Acceptada dalla radunanza communal digls 24-04-2018
e messa an vigour dalla suprastanza communal per igls 01-07-2018

Lescha d'ustareia aint igl cumegn Albula/Alvra (Lescha d'ustareia, LU)

Sa basond agl art. 35 cf. 2 dalla constituziun communal digl cumegn Albula/Alvra scu er dalla lescha d'ustareia per igl cantun Grischun LUG/GWG digls 7 da zarcladour 1998, ò la radunanza communal Albula/Alvra decidia suandontamaintg:

I. Determinaziuns generalas

Art. 1 Validitad e scopo

La lescha preschainta regla las concessiuns, las ouras d'avertura scu er las taxas an executiun d'activitads da hotellareia e gastronomia aint igl cumegn Albula/Alvra per mantigneir igl pôss, igl urden e la siertad scu er la protecziun dalla giuventetna.

II. Concessiun

Art. 2 Dumonda per manar en menaschi d'ustareia

¹ La dumonda per ena lubientscha tenor art. 3 dalla lescha d'ustareia digl cantun Grischun è d'inoltrar agl cumegn aglmanc en meis avant l'avertura u surpigeida digl menaschi d'ustareia.

² La dumonda ò da cuntigneir las suandontas indicaziuns:

- a. persunalias ed adressa dalla persunga, alla quala i duess neir do la concessiun;
- b. indicaziun exacta digl menaschi;
- c. indicaziun exacta d'eventuals menaschis secundars;
- d. dirada per lubientschas terminadas.

³ Alla dumonda èn d'aggiuntar:

- a. extract digl register penal;
- b. conferma sottascretga cun agen mang tenor art. 5 alinea 4 dalla LUG/GWG.

Art. 3 Dumondas per occurrenzas ed arranschamaints

¹ Per l'execuziun d'occurrenzas dad egn u ples deis ed arranschamaints, scu travagl d'ustareia occasional u per festas, noua tgi vign consumo speisas e bavrondas purtadas notiers sezs u furneidas, dovrigl ena lubientscha digl cumegn.

² Mademamaintg dovrigl ena concessiun per la cunsigna da speisas e bavrondas an ambiaint privat e saro, schinavant tgi ella succeda da professiun.

³ La dumonda ò da cuntignair las suandontas indicaziuns:

- a. persunalias ed adressa dalla persunga, alla quala i duess neir do la lubientscha;
- b. indicaziun exacta dall'occorrenza;
- c. indicaziun schi duess neir vandia vinars (lubientscha cantunala tenor art. 12 ss. dalla LUG/GWG);
- d. antschatta e finiziun planisada dall'occorrenza.

⁴ La dumonda per ena concessiun è d'inoltrar agl cumegn aglmanc en meis avant l'occorrenza u igl arranschamaint.

Art. 4 Dumonda per igl commers da vinars an detagl

La dumonda per dar ena lubientscha da vender vinars an detagl, ò da neir inoltrada ad ouras cun igl formular uffizial agl uffezi correspondent cantunal avant l'avertura d'en menaschi u l'execuziun d'en'occorrenza.

Art. 5 Concessiun

¹ Schinavant tgi las premissas legalas èn adampleidas, vign la concessiun concedida an scretg alla persunga autorisada avant l'avertura u surpigliada d'en menaschi u dalla realisaziun dall'occorrenza.

² Concessiuns dastgan neir lubeidas angal per locals tgi èn adattos e tgi caschungan cun igl sies travagl nigns disturbis insurpurtabels digl pòss da notg aint igl conturn u oters disturbis considerabels.

³ Adattos èn per regla menaschis tgi disponan d'indrezs, apparaturas, scu er d'indrezs da tualetta correspondents allas preteisas sanitaras e da victualias pulizias.

Art. 6 Cundiziuns

Per la protecziun dalla giuventetna e per igl mantignamaint digl pòss public, urden e siertad, pò la concessiun neir colleida cun cundiziuns.

Art. 7 Validitad dallas concessiuns

Dirada e scadenza dallas concessiuns sa drezzan tenor art. 6 ed 8 dalla lescha d'ustareia cantunala (LUG/GWG).

Art. 8 Angrondamaint, dislocaziun e midada digl tip da menaschi

¹ Angrondamaints considerabels u ena dislocaziun da travagls, scu er midadas digl tip da menaschi èn sottamess all'obligaziun d'aveir ena lubientscha.

² Per dumondas correspondentas vala tenor igl senn art. 2 alinea 1 e 2.

III. Ouras d'avertura

Art. 9 Ouras d'avertura

¹ Risguardond tottas determinaziuns legalas (publicas e da dretg privat) pon igls menaschis fixar sezs lour ouras d'avertura.

² Schinavant tg'igl mantignamaint digl pôss, digl urden e dalla siertad publica pretendan, pon neir fixadas ouras da sarada spezialas per singuls menaschis u parts digl menaschi.

IV. Taxas

Art. 10 Taxas e rom da taxas

Igl incasso da taxas sa drezza agl reglamaint dalla lescha d'ustareia digl cumegn Albula/Alvra.

I vignan incassadas las suandontas taxas:

- a. per la concessiun, las adattaziuns u per la retratga dalla concessiun d'ustareia anfignen 500.00 fr.
- b. per singulas occurrenzas tenor art. 3 anfignen 300.00 fr. per occurrenza.

V. Execuziun

Art. 11 Execuziun

La suprastanza communal relascha las determinaziuns executoricas basignevlas.

Art. 12 Pulizeia communal

La pulizeia communal exequescha la survegliaziun digls menaschis d'ustareia. Ella ò da tot taimp igl dretg d'access allas localitads.

VI. Determinaziuns penalas e meds legals

Art. 13 Determinaziuns penalas

¹ Chel tgi ignorescha sapientiv- u malprecautamaintg las determinaziuns da chesta lescha u a decrets ed ordinaziuns tgi sa basan a tala, vign punia cun ena multa d'anfignen 5'000.00 fr. Per cass pi levs pò neir desistia d'ena multa an favour d'en avertimaint resp. d'en castei.

² Schi igls delinquents ageschan an angurdientscha da gudogn, è l'istanza decisiva betg lieida ve digl import maximal da 5'000.00 fr.

Art. 14 Recurs

¹ Cunter tottas disposiziuns è avert igl recurs an terma da 30 deis alla suprastanza communal. Igl recurs ò da cuntigneir ena proposta, igls fatgs cun igls meds da cumprova scu er ena mutivaziun.

² Cunter decisiuns dalla suprastanza communal pò neir recurria an terma da 30 deis siva dalla cunsigna alla dertgira administrativa.

vii. Determinaziuns transitoricas e finalas

Art. 15 Determinaziuns transitoricas

¹ Tot las concessiuns dadas avant l'antrada an vigour da chesta lescha èn vaevas illimitadamaintg, schinavant tgi la persunga autorisada magna anavant igl menaschi aint igl madem rom.

² Proceduras pendentas igl mument dall'antrada an vigour da chesta lescha, on da neir tractadas tenor igl nov dretg.

Art. 16 Vigour

¹ La lescha preschainta è sottamessa agl referendum facultativ.

² La suprastanza communal definescha igl termin dall'antrada an vigour da chesta lescha.


³ Cun l'antrada an vigour da chesta lescha vignan dissolveidas tottas determinaziuns ed oters decrets tgi stattan an cuntradicziun cun tala.

Igl mastral



Daniel Albertin

Igl scrivant da cumegn



Maurus Engler